


ՍԱՐԳԻՍ ԻՍԱՅԻ ԱՐՈՎՅԱՆ
(1869—1942)

Սարգիս Իսայու Արովյանն իր ժամանակի այն սակավաթիվ գիտնականներից էր, որոնք քաղաքական-հասարակական, պետական գործունեության զուգընթաց բեղմնավոր աշխատանք են կատարել նաև գիտական ու գիտակազմակերպչական ասպարեզում: 1895 թվականին ավարտելով Լայպցիգի համալսարանի գյուղատնտեսական ֆակուլտետի և ապա Հալլեի համալսարանի ընդհանուր ագրոնոմիական ֆակուլտետի լրիվ դասընթացը, նա մասնագիտանում է կաթի տեխնոլոգիայի գծով:



Ֆրանսիայում, Շվեյցարիայում և Հոլանդիայում կաթնամթերքների արտադրությանը ծանոթանալուց հետո, 1896 թվականին Փարիզում նա ուսումնասիրում է կաթի և կաթնամթերքների միկրոֆլորան, հարստացնելով իր գիտական պաշարը նաև այդ ուղղությամբ:

1897 թվականին վերադառնալով իր հայրենիք՝ Զալալ-Օղլի գյուղը (ներկայիս Ստեփանավան քաղաքը), Սարգիս Արովյանը երկար ժամանակ մեծ ջանքեր է թափում Լոռվա գյուղացիներից կաթնագործական արտելները և կերակրության կազմակերպելու համար, սակայն տեղի իշխանությունները խոչընդոտում են, խանգարելով նրան հասնելու իր նպատակներին:

Եվրոպայում եղած ժամանակամիջոցում Սարգիս Արովյանը լավ ծանոթանում է եվրոպական մի քանի երկրների, հատկապես Շվեյցարիայի, Հո-

լանդիայի և Նորվեգիայի անասնապահության, անասնաբուծության գործի դրվածքին, լավ տիրապետում է այգայիսի աշխատանքներ վարելու եղանակներին: Վերադառնալով հայրենիք, նա ցանկանում էր իր հայրենակիցներին զինել անասնապահությամբ և անասնաբուծությամբ վարելու նորագույն եղանակներով, որպեսզի նրանք իրենց անասուններից ավելի մեծ բարիքներ — արտադրանքներ ստանան, սակայն նա չկարողացավ իր նպատակներն իրականացնել, քանի որ նրան շատ էին խանգարում մի կողմից՝ մասն — ցրված անհատական տնտեսությունները, մյուս կողմից՝ այն մեծ խոչընդոտները, որ ստեղծում էին տեղական իշխանավորները:

Իր այդ ձգտումները մասամբ իրականացնելու համար Սարգիս Արովյանը 1890-ական թվականների վերջերին Շուշա վերում (ներկայումս Շահումյան —

վրացական ՍՍՀ) բացում է պանրագործարան և մինչև 1906 թվականը հայ ու ադրբեջանցի գյուղացիներից այնտեղ պատրաստում է կաթնագործ կադրեր:

1905 թվականին, քաղաքական իրադարձությունների հետևանքով, այդ պանրագործարանի ունեցվածքը ավարի ենթարկվելով, թալանվում է: Սարգիս Աբովյանի այդ շնորհակալ գործն էլ խափանվում է, որից հետո, 1906 թվականից նա մանկավարժական աշխատանքի է անցնում Թիֆլիսի Գայանյան դրպրոցում՝ սկզբում որպես բնագիտության և մաթեմատիկայի դասատու, իսկ հետագայում աշխատում է նաև որպես նույն դպրոցի տեսուչ:

Հայաստանում սովետական իշխանության հաստատվելուց հետո, 1921 թվականի սկզբներին Սարգիս Աբովյանը տեղափոխվելով Երևան, վարում է մի շարք պատասխանատու պաշտոններ: Նա եղել է Հայկական ԽՍՀ Հոգժողկոմատի կոլեգիայի անդամ, որոշ ժամանակ վարել է նաև Հոգժողկոմի տեղակալի պաշտոնը:

1922—1923 թվականներին Սարգիս Աբովյանը եղել է Լուսավորության ժողովրդական կոմիսար, ապա մինչև 1925 թվականը՝ նույն կոմիսարիատի կոլեգիայի անդամ և գլխավոր պրոֆեսիոնալ կրթության բաժնի վարիչ:

1925—1928 թվականներին Աբովյանը նորից աշխատում է Հոգժողկոմատում, վարելով «Պանիրյուղիկներունի» վարչության նախագահի պաշտոնը:

Վարչական աշխատանքներին զուգընթաց, 1923 թվականից սկսած Ս. Աբովյանն իր մասնագիտության՝ կաթնատնտեսության գծով մանկավարժական և գիտական աշխատանք է կատարում Երևանի պետական համալսարանում: Նա բարձրորակ դասախոսություններ էր կարդում կաթի տեխնոլոգիայից: Ս. Աբովյանը միաժամանակ եղել է պետական համալսարանի գյուղատնտեսական ֆակուլտետի դեկանը, իսկ երբ 1930 թվականին այդ ֆակուլտետի բազայի վրա կազմակերպվեց հայկական գյուղատնտեսական ինստիտուտը, նա եղավ վերջինիս առաջին գիրեկտորը և այդ պաշտոնը վարեց մինչև 1937 թվականը:

Սարգիս Աբովյանը բազմակողմանի պատրաստականություն ունեցող գիտնական էր: Նա շատ լավ գիտեր անասնապահությունը, անասնաբուժությունը, հատկապես կաթնատնտեսությունը և հարակից մասնագիտությունները: Նրա անվան հետ է կապված կաթնատնտեսության զարգացումը Հայաստանում: Սարգիս Աբովյանի գրչին են պատկանում հայերեն լեզվով գրված առաջին «Կաթնատնտեսության դասընթաց» ձեռնարկը, մի շարք գիտական և գիտահանրամատչելի գրքուկներ ու հոդվածներ, որոնք մեծապես նպաստեցին կաթնատնտեսության զարգացմանը Հայաստանում: Այդ աշխատություններից շատերը ներկայումս էլ չեն կորցրել իրենց թարմությունն ու նշանակությունը:

Սարգիս Աբովյանը գործուն մասնակցություն է ունեցել Հայաստանի տավարի ցեղի բարելավման, կովերի կաթնատվության բարձրացման համար անհրաժեշտ միջոցառումներ մշակելու գործում: Հատկապես հիշատակության արժանի են այն շնորհակալ աշխատանքները, որ նա առաջին անգամ կատարել է Հայաստանում պանրագործությունը զարգացնելու և պանիրների տեխնոլոգիան կատարելագործելու ուղղությամբ:

Սարգիս Աբովյանը մահացել է 1942 թվականին:

Պրոֆ. Ն. Կ. ՓԱՆՈՍՅԱՆ